



HEINRICH TIMMEREVERS
BISKOP DRJEŽDŽANSKO-MIŠNJANSKI

Zwažić so z Chrystusom žiwi być

Pastyrskie słowo k přenjeji póstnej njedźeli, 18. februara 2018

Lube sotry a lubi bratřa we wěrje!

Rozsudnje, konstruktivne a kreativne – takle pokazuje so mi Drježdžansko-Mišnjanske biskopstwo wosrjedź dopóznawanskeho procesa. Wězo trjebaš na někotrych městnach wjace chwile, sčerpliwosć a fantaziju, zo bychy so kompleksne nadawki rozjasnili. Ćim džakowniši sym, zo wostanje w boju wo kmane struktury a wotmołwy prašenje „K čemu tu smy jako cyrkej?“ z wodźacej perspektiwu.

Biskop dr. Heiner Koch zahaji w lěće 2014 dopóznawanski proces ze swojim pastyrskim słowom „Powołani k eucharistiskej cyrkwi – Tak přitomny być kaž je WÓN přitomny“. Jeli je za nas swjećenje eucharistije woprawdže źórło a wjeršk našeho wosobinskeho a zhromadneho žiwjenja, potom smy přez nju zhromadnosć, kotraž na JEHO słowo slucha, so k NJEMU wuznawa, a z tym stanjemy so z gratom za NJEHO w swěće. Dobře poselstwo ze žiwjenjom wuznawać, wuchadźa z wołtarjow našich cyrkwjow!

Znamjenja bliskosće a lubosće Božeje – sakramenty – darja nam wšitko, štož trjebamy, zo móžemy jako křćeni a firmowani tomule powołanju scěhować. Hdyž so młodži mužojo z našich swójbow a wosadow rozsudźa, so jako měšnicy ze swojim žiwjenjom cyle Bohu darić a sebje za lud Boži do služby wzać dać – potom skutkuje Jězus Chrystus sam na swojej cyrkwi a wosrjedź njeje. Přez swoju službu skrućeja a podpěruja woni nas wšitkich w našim póstanju za swět. Hdyž do swojeho žiwjenja pohladamy, móžemy sej wotkryć, kak su

měšnicy ze swojim žiwjenjom a swojej službu w našich wutrobach žadosć za Bohom budźili abo nas bliskosć Božu začuwać dali. Snano dopomniće so na swojeho młodzinskeho kapłana, kotryž je Was na Wašim puću wěry bytostnje sobu formował, na měšnika, kotryž je Wam w ćežkich žiwjenskich situacijach w dušepastyrskiej rozmołwje abo w sakramenće pokuty po boku stał, na fararja, před kotrymž sće swoje haj k swojemu partnerej prajili, kotryž je Waše džěćo křćić abo za Wašich lubych rekwiem swjećić. Božu bliskosć móžeće začuć na kóždej Božej mši, kotrejž měšnik – při wšěch swojich čłowječich słabosćach – jednajo we wosobje Chrystusa jako hłowje předsteji!

Lube sotry a lubi bratřa,

jeli chcemy tež přichodnje z eucharistije sem žiwa a sylna zhromadnosć być, potom trjebamy měšnikow!

Směmy w našim biskopstwje džakowni być, zo so tuchwilu dwanaće muži na měšniske powołanje přihotuje. Dobra ličba, ale při wšěm přemała! Wy wšitcy znajeće diskusiju w našej cyrkwi, zo měli so puće přistupa k měšnistwu změnić a wotewrěć. Njewěm, kotry puć nam bamž Franciskus w zamołwitosći za wšu swětowu cyrkej a w přezjednosći z biskopami nam do přichoda pokaza. K tomu je swětło Ducha Swjateho trěbne. Jedne pak wostanje: Powołanja k měšnistwu njemóžemy činić; Bóh je nam dari! Wone wuwijawa so w našich wosadach, jeli je w nich doma žiwa wěra a dowěry na Knjeza, kotryž je tež džensa ze swojej cyrkwju po puću. Njezačuwamy to wosebje tam, hdžež so wo powołanja modlimy? Tohodla chcu nas wšitkich na Jězusowe wuprajenje dopomnić: „Prošće Knjeza žnjow, zo by džěłaćerjow na swoje žně pósłať.“ (Mt 9,38) Prašam so, hač smy so dosć wo to modlili a hač so dosć modlimy, zo by Knjez džěłaćerjow na swoje žně pósłať.

Lube křescanki a lubi křescenjo, wobnowmy swoje modlenje wo duchowne powołanja. Moja naležnosć je, zo stanje so modlenje wo měšnikow a rjadniske powołanja w našich wosadach ze swěrnej samozrozumliwosću. Jězus sam nam tole nawda!

Prošu Was, zo byšće starosć wo duchowne powołanja do swojeho modlenja zapřijeli. Přeco zaso mje zwjesela, hdyž zhonju, zo so w našim biskopstwje wěriwi w modlerskich kružkach wo duchowne powołanja zetkawaja. K zwjazanju tutych a nowych skupin a

institucijow w tutej naležnosći přeprošuju wutrobnje k přěnjemu modlerskemu zetkanju našeho biskopstwa do Wechselburga. Njedźelu, 10. junija, budžemy so na nyšporje (versperje) wo duchowne powołanja modlić. Při tym chcu wobstejace kružki w jich skutkowanju posylnić. Chcu nastorčić, zo so w našich wosadach a zwjazkach zhromadneje zamołwitosće (pastoralnych rumach) nowe modlerske zhromadženstwa wutworja, kotrež so tutej naležnosći na wosebite wašnje zawjazani čuja.

Lube sotry a lubi bratřa, hdyž na zetkanja při wopytach w našich wosadach abo šulach myslu abo hdyž so na rozmołwy z młodostnymi w zwisku přihota na firmowanja, na młodzinskich nyšporach (versperach) a zjězdach diecezanskeje młodžiny dopomnju, potom napjelnja mje hłuboke přeswědčenje, zo su mjez nami młodži mužojo a žony, w kotrychž wutrobach žadosć za žiwjenjom w cyrkwinskej službje rosće. Maš zawěrně tajkich młodostnych, kotřiž so chutnje prašeja, k čemu jich Bóh woła a kotry puć w Jězusowym naslědnistwje móhli woni hić. Chcu tutej młodostnych, młodych muži a młode žony pozbudzić, zo bychu so Božemu wołanju wotewrěli. Młodžinskeho dušepastyrja našeho biskopstwa, fararja Martina Kochalskeho, sym prosył, zo by młodym ludžom, kotřiž powołanje začuwaja a za jasnosću pytaja, jako rozmołwny partner k dispoziciji stał. Zdobom sym sej wěsty, zo naši měšnicy, rjadnicy a wšitcy w dušepastyrstwje skutkowace žony kaž tež mužojo młodych ludži zamołwiće na městnje w jich rozsudach přewodžeja. Prošu jich pak tež, zo na swoje powołanje kedźbliwje dźiwaja a žiwe zachowaja, zo bychu tež dale pozbudźowacy swědkojo poradženeho žiwjenja w naslědnistwje Jězu Chrysta być móhli.

Hdžež my jako cyrkej w našich wosadach młodym ludžom składnosć damy, zo móža so rozwić, začuja woni, z kotrymi talentami su woni w zhromadženstwje wěriwych trěbni a česćeni. Přěju sej wosady, w kotrychž su młodži ludžo witani, dokelž čuja so ze swojimi darami a talentami, ale tež ze swojimi prašenjemi a dwělemi přiwaći. Přěju sej wosady, w kotrychž Wy, lube sotry a lubi bratřa, swoju žiwu wěru z lubosću a swobodnje wuznawaće, dokelž to młodych ludži pozbudža, so na Jězusa Chrystusa nastajić. Při tym mamy na to dźiwać, zo nikomu powołanje njenapowědamy. Bóh je dari! Jako křesćenjo pak njesměmy tež nikomu přeće, Jězusowemu wołanju scěhować, wurěčeć! Skerje pomha tule so modlić, zo bychu so wołani pruwować móhli, zo bychu jasnosć našli a so wjesele a poźni dowěry na

wołanje nastajíc móhli. Bamž Benedikt XVI. je k tomu pozbudźace słowo rjekł: „Štóž so na Jězusa nastaji, ničo njezhubi, ale wšo dobudže.“

Z tymle wuprajenjom bamža Benedikta strowju Was wšěch, lube sotry a lubi bratřa!
Štyrćećidnjowski jutrowny pokutny čas, do kotrehož smy zastupili, njech nam pomha, zo so znowa na tohole skřižowaneho a zrowastanjeneho Knjeza nastajimy. Z nim dobudźemy žiwjenje!

K tomu požohnuj Was Trojjenički Bóh, Wótc, Syn a Duch Swjaty!

Waš



Heinrich Timmerevers

Drježdźansko-Mišnjanski biskop